



Ova vjera je savjet/iskren odnos

Od Ebu Rukajje, Temima ibn Eusa ed-Darija, radijallahu anhu, prenosi se da je Allahov Poslanik, sallallahu alejhi ve sellem, rekao: "Ova vjera je savjet/iskren odnos." Upitali smo: "Za koga?" Rekao je: "Za Allaha, Njegovu Knjigu, Njegovog Poslanika, za vođe muslimana i za obične ljude."

[صحيح] [رواه مسلم]

Allahov Poslanik, sallallahu alejhi ve sellem, obavijestio je da se vjera temelji na iskrenosti i istini, kako bi se izvršavala onako kako je Allah naredio – potpuno, bez nemara i bez prevare. Tada je Allahov Poslanik, sallallahu alejhi ve sellem, upitan: "Prema kome je vjera iskren odnos (nasihat)?" Pa je odgovorio: Prvo: Iskren odnos prema Allahu ogleda se u tome da se djela čine iskreno radi Njega, bez ikakve primjese širka; da vjerujemo u Njegov rububijet (gospodarstvo), uluhijet (božanstvenost), Njegova lijepa imena i savršene osobine; da veličamo i poštujemo Njegove naredbe, te da pozivamo druge u vjerovanje u Njega. Drugo: Da čvrsto vjerujemo da je Kur'an Allahov govor, Njegova posljednja objavljena Knjiga, i da je dokinuo sve prijašnje objave. Da ga poštujemo i veličamo, učimo kako dolikuje, primjenjujemo njegove jasne propise, a ono što nam je nejasno da prihvatamo s potpunim predanjem, prepuštajući značenje toga Allahu. Da branimo Kur'an od iskrivljenih tumačenja, poučavamo se njegovim opomenama, širimo njegove znanosti i pozivamo druge da ga slijede. Treće: Iskren odnos prema poslaniku Muhammedu, sallallahu alejhi ve sellem, znači da budemo čvrsto ubijeđeni da je on posljednji Allahov poslanik, da potvrđujemo istinitost svega s čim je došao, da se pokoravamo njegovim naredbama i klonimo onoga što je zabranio. Da činimo ibadet Allahu samo na način koji nam je on prenio. Da mu iskazujemo poštovanje kakvo mu dolikuje. Da širimo njegov poziv, prenosimo njegovu vjeru i branimo ga od svih neistina i optužbi. Četvrto: Iskren odnos i prema vođama muslimana podrazumijeva da im budemo podrška u dobru i istini, da im ne osporavamo vlast, te da ih slušamo i pokoravamo im se u onome što je u skladu s poslušnošću Allahu. Peto: Iskren odnos prema običnim ljudima obuhvata činjenje dobročinstva prema njima, da im ne nanosimo štetu, te da s njima sarađujemo u dobru i bogobožnosti.

النجاة الخيرية
ALNAJAT CHARITY

